

四庫全書

集部

欽定四庫全書

集部

大隱集卷二

詳校官左中允_臣 瑋五珠

主事_臣 呂雲棟覆勘

謄錄監生_臣 董

誠

欽定四庫全書

集部四

提要

大隱集十卷

別集類三 宋

臣等謹案大隱集十卷宋李正民撰正民有
己酉航海記已著錄正民宋史無傳事蹟始
末不可考惟據航海記所述知其事高宗為
中書舍人嘗奉使通問隆祐太后而已今以
集中諸表考之則在朝嘗為給事中禮部吏

部侍郎在外嘗知吉州筠州洪州温州婺州
淮寧府數歷頗久晚予宮祠以歸又考徐夢
莘三朝北盟會編載紹興十二年五月金元
帥來書云汴梁留守孟庾陳州太守李正民
及畢良史者比審議使蕭毅等回具言江南
嘗詢訪此人今並委沿邊官司發遣前去六
月金人放東京留守孟庾知陳州李正民還
云云是正民於知陳州時嘗為金人所獲以

和議成得還集中南歸詩所云淪身絕域久
睽孤投老歸來鬢髮踈者蓋即其事特孟庾
以東京附金歸後高宗棄不復用而正民屢
更任使終始弗替則其在金朝當猶未至於
失節特史文闕畧不能得其詳耳其集見於
宋史藝文志者三十卷傳本久佚惟嘉興府
志載其海月亭詩一首今據永樂大典所載
掇拾編次釐為文六卷詩四卷中多中書制

誥之作溫潤流麗頗近浮溪其詩亦妍秀可
誦在南渡初猶不失為雅音焉乾隆四十六
年九月恭校上

總纂官

臣紀昀

陸錫熊

孫士毅

費

總校官

臣陸

費

墀

費

欽定四庫全書

大隱集卷一

宋 李正民 撰

制

朱勝非觀文殿大學士知洪州制

勅通班祕殿地冠禁嚴作牧大邦望隆屏翰匪我舊弼
曷稱茂恩具官德宇靖深材猷博敏懿文足以華國讜
議足以濟時徧歷禁塗荐更政府適屬省方之日進躋
次輔之聯遽解繁機易臨近郡朕惟君臣相與之際既

諒乃誠而進退曲全之間重違所請眷鍾陵之都會實
江表之上游繫我宗工鎮茲南服乃申前命庸便爾私
噫廊廟暮年克保初終之節湖山千里允資綏撫之方
毋有遐心佇聞報政可

觀文殿學士中太一宮使除右弼制

門下鳴玉曳履風隆祕殿之班當軸處中尤慎西臺之
長眷惟舊德方領真祠宜錫命書還弼予治具官某風
猷凝遠器宇端方才周萬務之原學貫六經之奧懷文

抱質彬彬君子之儒效信納忠蹇蹇王臣之節早騰令
聞浸歷要途惟中外之荐更嘉勲勞之備著言皆可績
每堅享上之誠知無不為確守致君之義旋躋華於清
禁仍均逸於殊庭陪輔燕朝有獻納論思之益雍容琳
館適冲虛恬淡之遊雖高難進之風殊鬱具瞻之望朕
方循名而責實稽古以建官耳目股肱增重廟堂之選
左右前後聲新輔佐之聯必惟其人久虛乃位往踐厥
服莫如汝諧勛相鈞衡允賴訏謨之助典司機密聿觀

政事之修載示寵光庸昭體貌於戲尊德樂道王者所以立太平之基經體贊元賢人所以成可大之業茂摠其蘊永孚于休可

王棣贈資政殿學士制

勅志能之士因時而立功名封疆之臣守死而明節義既歎捐軀之易宜推卹典之隆具官出自相門躋于侍從智勇足以扞難恩惠足以撫民久領近邦適逢外寇力振孤軍之氣屢摧強敵之鋒爰既甚於析骸食殆窮

於掘鼠睢陽無援張巡之志不衰東郡久圍臧洪之辭
靡屈雖勢窮而力盡終身殞而名存特升祕殿之華資
俾視政塗之寵數用彰死節加賁泉扃式慰冥漠之知
聿為忠義之勸可

顏岐資政殿學士官祠制

勅朕憂勤庶政思濟艱難進退大臣矜全體貌具官早
以材望聞于搢紳徧更侍從之華進秉鈞衡之重贊襄
滋久裨益居多方隆注倚之懷遽有便安之請察其雅

志蓋亦重違加祕殿之寵名領殊庭之館御庸昭朕眷
庶便爾私噫邦國多虞賴君子經綸之蘊燕閒自適蹈
大雅明哲之方毋有遐心對予休命可

范宗尹除叅知政事制

勅朕履險阻艱難之會懷宗廟社稷之憂迫蹙侵陵曾
無寧歲震蕩播越靡有莫居思得豪英之材共濟阽危
之運具官某清明而博達簡重而粹夷與學貫于本元
沈謀周于事物惟衆口易諛之日當諸儒射策之辰首

發讜言力扶頽俗逮寇難之遽作以直諒而見思擢置
憲臺遂躋諫省比召從於外服旋進長於中司慷慨濟
時之心密勿安邦之論屢觀獻納灼見忠嘉宜峻陟於
文階俾參陪於政路天下之勢如置器必審處於安危
邦家之基在得賢每因人而輕重往服朕命其遠乃猷
可

張守翰林學士制

勅帝王有所號令前代議者謂其難能文章施於朝廷

近世儒臣以為榮遇矧在險阻艱難之際欲圖德意志
慮之孚入直禁林必符雅望具官性資鯁亮材術周通
與學貫乎九流高文兼於衆體訓詞溫厚允資西掖潤
色之工議論堅明更顯南司糾彈之峻薛宜舉措之當
理真卿繩治如平時比懇解於憲綱乃力祈於外補朕
惟爾久居臺閣宜在朝廷俾參宗伯之官將典行臺之
政載念北門之邃夙傳內相之稱警蹕時巡文書雲委
方用兵如至德式求深謀密議之咨詢必下詔若奉天

可使悍卒武夫之感涕力行爾學庸稱朕恩可

劉洪道除直顯謨閣制

勅國家承平日久州縣之官非文法吏即書生也自外敵馮陵繼以寇盜二千石而下顛沛失據莫能枝梧而元元之衆病矣此朕焦心勞思求慷慨之士為吾扞禦以慰安斯民也爾奮身庠序早更任使青齊之郊實爾桑梓之地乃能糾率師徒撫寧三郡奏功來上朕用汝嘉峻陟文階進直延閣益圖來效庸稱茂恩可

程昌寓直顯謨閣制

勅國家承平日久

至以慰安斯民也同前

爾智畧深茂材力強勉

承淮蔡傷殘之後而能拊循疲瘵繕修守備朕用嘉之
乃俾進職二等以為爾勸昔漢世二千石有治理効輒
增秩賜金以表寵之爾宜體朕意益懋爾庸尚有褒恩
以須後效可

晁公為直顯謨閣制

勅具官延閣寓直儒臣清選二千石有治理効輒畀以

美名所以示勸也爾服勤文藝不墜家聲承流海邦敏
於從政來朝行在朕用汝嘉其繇中祕之嚴躡進文謨
之直往欽朕命尚勉厥修可

胡寅直龍圖閣宮觀制

勅具官國家祥符中肇建延閣以奉祖宗謨訓華榜昭
揭擬古河圖乃置學士待制等員以為縉紳勸譽處而
資望未至者亦俾寓直其間迄今為五閣之冠其選任
豈不美哉爾儒雅端亮躋于柱史乃以親疾祈便奉養

貼以峻職處之祠庭爾其益勵忠孝之節以待異時之用尚其勉之可

王賓追復龍圖閣學士制

勅赦過宥罪惠溥及於多方隱卒崇終禮風優於近列
乃眷論思之舊肆頒甄叙之恩具官學問深醇性資直
諒事朕干戈之際脩殫羈勒之勞粵自臺端亟躋諫省
進執中司之法旋更八座之聯獻納居多每盡心於啓
沃忠誠自許浸忤意於貴權遂貽貝錦之傷往就祠庭

之逸方思圖任遽歎淪亡念沛澤之存更矧嘉言之猶
在俾復河圖之職聿為寔宥之光恩典有加幽冥無憾
緬惟精爽尚克欽承可

王朋約贈直龍圖閣制

勅具官朕頃者省方淮甸移蹕江吳念斥堠之不明駭
風塵之甚遽衣冠頓踣倪耄震驚眷惟在服之臣不及
巨川之濟隕于非命朕甚傷之爾列職周行宣勞王事
奄罹物故適丁斯時其進直於河圖仍優加於恩典庶

幾冥漠尚克欽承可

劉晏直龍圖閣制

勅具官比自外敵馮陵繼以寇盜其能先登賈勇以挫其鋒者鮮矣爾以忠力自奮糾率戎行阻隘鼓僥殺敵決勝乃俾進直河圖以為爾勸是謂不次之賞矣其益恩所以稱之可

劉榕除直龍圖閣制

勅濟陰大邦也自敵國侵暴之後寇攘競擾二千石能

保其封疆亦已難矣爾頃以材猷往膺郡寄閱時滋久
宣力居多乃俾進直河圖以為勸傳不云乎有功而見
知則說矣尚勉之哉可

劉洪道直龍圖閣制

勅朕惟海岱之區絲枲之利號為冠帶衣履天下自頃
羣盜相挺兵無寧歲田萊多荒呻吟未息其能攘却醜
類以保斯民者可無褒勸之恩哉爾早膺任使總制東
秦而能勦除鯨鯢撫綏疲瘵河圖之直文階之峻併以

命爾式獎賢勞往服恩榮益登乃績可

李擢徽猷閣待制制

勅朕惟祖宗聖神相繼咸有謨訓載在方冊歷代寶之
藏于延閣又命儒學之士寓直其間以為咨訪討論之
地其選任顧不美哉具官文辭之敏行義之良早被徵
求荐躋華貫掖垣瑣闥嘗已踐更屬時艱危久辭著位
宜還次對之選以備內朝之臣往即欽承無忘勵翼可

何志同復待制制

勅朕紹履尊極康濟艱難思得四海賢雋豪傑之士共
圖興復庶臻嘉靖矧嘗位禁從之臣豈宜置而不用哉
具官問學淹該器質純粹典領編摩之任優游禮樂之
司遂進長於天官旋躋華於祕殿比從物議稍黜近班
宜推起廢之仁復還次對之選尚思勵翼庸副眷懷可

康允之除徽猷閣待制制

勅國家肇建延閣以奉祖宗謨訓翬飛跂翼邃在西清
乃置學士待制等員以為搢紳譽處二千石有治理効

輒畀以美名聯于法從所以示褒勸也具官某懷應務之材有御衆之略早更煩使克著能聲比守壽陽屢摧強敵速移鎮於武林而能寓兵於農鼓作士氣為戰守備忠績可嘉宜還次對之班增重名藩之寄夫膺文儒之選以論思獻納為先專方面之權以鎮禦撫綏為重益圖來効庸稱朕恩可

劉洪道除待制制

勅國家肇建延閣以奉祖宗謨訓又置學士待制等員

以為搢紳譽處二千石有治理効輒畀以美名所以示
褒勸也具官智略深沈材猷敏達早膺顯授總制東秦
保全一方攘卻勅敵宜升次對之秩增重連城之寄斯
為高選其益懋哉可

商守拙待制制

勅延閣謨訓所藏西清咨訪之地靡勞心於文墨將次
對於燕閒爰渙茂恩用優者德具官處躬純厚應務詳
明練達國章進躋廷尉釋之議罪每見於持平陳寵獻

言務從於矜恕擢司憲部允賴老成迺引疾以陳辭欲就閒而去位朕法仁祖之寬厚舉嘉祐之詔條讞議頗殊於重輕著令未分於甲乙必資明習文法之士以定摩研編削之規雖遽去於朝廷宜勉留於祠館往親藥石之輔少須符竹之行尚究乃心圖稱朕命可

范直方直秘閣叅議官制

勅惟爾曾大父仲淹方未顯時慨然已有憂天下之志晚更大任名重華夷輔政臨戎咸有成績深謀讜議人

至于今稱之爾漸摩餘訓克守家法服采朝列未究爾能乃俾奪情進直延閣叅吾行營之議朕將觀爾之材而試用之矣尚勉之哉毋忝朕命可

張上行直秘閣制

勅具官漢自宣帝綜覈名實二千石有治理効輒增秩賜金或爵至關內侯故漢世良吏於是為盛稱中興焉爾頃以材猷往臨郡寄兵既服於紀律民遂安于里閭冉號晏安巴夔靜謐俾進直於延閣用旌表於爾勞思

稱朕恩益圖來効可

胡考寧直秘閣制

勅具官中秘寓直清選也異時文學材能之士咸得庀職其間所以勸在列而起治功也爾倅貳襄陽屢當寇敵踰年保守宣力惟多則汝之材能可見矣乃俾進直以為爾勸是曰優寵其益懋哉可

賈惇詩直秘閣制

勅具官中秘圖書之府朝廷以為清選異時文學材能

之士咸得充職其間所以勸在列而起治功也爾倅貳
淮邦克圖固守因事獻策忠義可嘉乃俾進直以為爾
勸是曰優寵其益懋哉可

陳國瑞直秘閣制

勅具官惟我太宗崇儒右文肇建秘閣奎壁之畫昭回
在上又命儒學之臣寓直其間以為咨訪討論之地諒
匪名人未易稱選爾以材猷之敏將漕浙部錫對便殿
敷納可嘉進直中秘之嚴增重皇華之寄往祗朕命益

究乃心可

梁汝嘉直秘閣制

勅中秘寓直清選也異時文學材能之士咸得充職其間所以勸在列而起治功也爾倅貳支郡服采惟勤朕比因時巡再臨涖部供帳趣辦民不告勞則爾之材能可見矣自頃貳車未嘗貼以秘職今以命爾是為優恩其尚知勸而勉哉可

向子伋直秘閣制

勅惟我太宗崇儒右文肇建秘閣奎壁之畫昭回在上
乃命儒學之臣寓直其間以為咨訪討論之地自匪名
人未易稱選爾以材猷往膺郡寄踰年于此治効已彰
宜增重於麾符俾進職於中秘益思砥礪圖稱恩榮可

滕膺直秘閣制

勅國家承平日久州縣之間非文法吏即書生也自外
敵馮陵繼以寇盜二千石部使者顛沛失據莫能枝梧
而元元之衆病矣此朕焦心勞思求慷慨之士以將使

指而慰安斯民也爾智略深茂材術強敏早繇州掾能禦賊鋒倅貳淮陽克著聲績自被皇華之選尤嘉宣力之勤進直秘嚴以為爾寵宜體朕意勉迄爾庸尚有褒恩以須後効可

陳機直秘閣制

勅具官爾以艱難之時居郡守之任用能繕脩備禦審度事幾奏牘詳明達于行在察其忠蓋朕用汝嘉進直中秘之嚴增重一邦之寄益圖來效庸稱朕恩可

趙不羣直秘閣制

勅具官中秘寓直清選也異時文學材能之士咸得充
職其間所以勸在列而起治功也爾頃以邑令能禦強
敵擢貳郡政宣力尤勤比涉鯨波朝于行在論事中理
朕甚嘉之乃俾升華延閣倅于近郡是為優寵其益懋
哉可

萬格監察御史制

勅具官御史府朝廷紀綱所寄自分建六察以督文昌

諸曹之政事凡有稽違皆得糾而治之于是抨彈之職益為雄峻爾剛介不屈儒學自將黌舍郎曹譽處休顯宜易冰廳之簡往踐霜臺之嚴爾其澄肅官僚振舉法度斯為稱職尚勉之哉可

楊準禮監察御史制

勅國家自元豐中始正御史之職以分察文昌六曹之政事視唐推彈公廨雜事之制為加詳矣于是樞機周密品式備具上下相維莫有苟且之意迄于今而遵用

之宜擇其人俾修厥職爾議論平正經術深醇茲用擢
置臺屬以司糾察之事傳不云乎人有所不為然後可
以有為朕觀汝之靖共守道不求合于當世之人今或
可以有為矣尚其勉哉可

沈與求殿中侍御史制

勅御史府朝廷網紀之地臺綱正則朝廷治朝廷治則
天下理故選用寮屬必得實材爾問學多通議論持正
比自師儒之官錫對便殿嘉爾敷納擢置抨彈乃能遇

事慨然無所枉撓旋更郎署未究爾長其執法於殿中以糾繩於列位爾其毋畏拂指毋憚當權知無不言以廣朕耳目之寄斯為稱職尚勉之哉可

趙鼎侍御史制

勅憲府職在糾彈臺端號為雄劇維持政體督察官邪儻正色而立朝可不繩而自肅爾材猷敏達議論堅明嘗賦命於使華旋記功於選部頃繇諫省執法殿中不為義疚而利回豈以剛吐而柔茹抨彈既允裨益居多

其升橫榻之嚴進貳中司之峻惟爾之任職者見於已
試而朕之用爾者蓋以叙遷益奮厥忠奚俟多訓可

胡寅當直柔左右史制

勅左右置史言動必書自艱難以來或廢典籍而不錄
然春秋之義常繫日月而無遺若時記注之臣思得譽
髦之士茲以爾寅湖湘之秀直諒多聞以爾直柔名臣
之孫儒雅蘊藉宜並司于國志以對待于螭坳往修厥
官無忝朕命可

趙鼎除御史中丞制

勅昔諫議大夫鄭昌有言山有猛獸藜藿為之不採是以汲黯在朝淮南寢謀干木處魏諸侯息兵矧居綱紀之地持糾彈之權為吾中執法者乎誠得人而任之則精神折衝有見於朝廷之上矣具官操行直方志氣剛大既潔身而無黨每論事而不回自總雜端風節甚峻屬中司之虛位顧橫榻之久專宜進長於南臺俾澄肅於在列真卿之當至德繩治不異於平時孔緯之在鳳

翔造朝獨先於百辟勿以擾攘而廢厥職思於艱難而盡其忠往體訓言期予于治可

汪藻給事中制

勅黃門列職均為侍從之臣東省設官乃專論駁之任擇人而授歷代攸艱雖官曹沿革之制不同而政令書讀之事則一匪時髦傑弗以次遷具官某襟度粹夷性資端亮夙蘊貫穿淹該之學發為經奇偉麗之文荐長贊書動無滯思簡嚴而蔚仲舒最得於古風純厚而明

元稹遂變於時體雖稱辦事尤謂賢勞宜進陟於瑣闥
俾更直於螭禁當官不撓尚觀批勅之言論事必行更
効回天之力益堅爾守庸稱朕恩可

胡安國除給事中制

勅朕惟祖宗時中書門下合而為一而封駁之官實在
銀臺不廢厥職肆朕慕服屬時艱難爰舉舊章務從簡
易封駁之任必惟其人具官某以文學甲儒科以德行
著閭里嘉言讜議顯于朝廷朕方康濟阽危寤寐賢俊

宜為朕起復還邇聯爾其守乃節修乃職舉凡詔勅有未善除授有不當悉論而駁正之勿使批敕之名獨專於前世尚勉之哉可

周望給事中制

勅上詞同

具官某操履清修志氣剛大頃求人而將命乃

狗義以請行遂旌爾勞寢陟華貴比戎車之及境復抗節以出疆輶傳載馳能達國命孔子不云乎行已有恥使於四方不辱君命可謂士矣爾其守乃節修乃職凡

詔勅有未善除授有不當悉抗論而駁正之勿使批勅之名獨專於前世則於爾為無愧矣尚勉之哉可

謝克家兵部尚書制

勅文昌分理萬務武部實掌五兵自國家復董正之聯視前代有因革之異軍政歸於樞府右選揔於天官品秩高華文書清簡匪時賢德曷稱褒遷具官材度宏深性資忠厚殖學造古人之蘊搗辭追作者之英早師表於儒宮遂翺翔於諫省文章爾雅入更四禁之遊惴惴

無華出載列城之譽久辭著位想見儀型比錫對於便
朝實副懷於虛佇宜陟中兵之長進聯八座之崇時屬
多虞朝方尚武雖軍旅征伐必資廟算之奇而獻納論
思允賴辰猷之告益殫忠藎圖濟艱難可

曾楸禮部尚書制

勅文昌兼總六聯宗伯實典三禮禱祠祭祀之事既繫
於司存學校選舉之文悉掌其政令比屬干戈之擾靡
聞典籍之傳必求其人俾領厥事具官風猷莊重德宇

粹溫學該六藝之醇文擅四科之美早馳聲於庠序旋
任職於詞垣浸升延閣之班出奉名藩之寄朕遭罹變
故躬總師徒既垂橐於爾邦遂駐蹕於近甸首修朝貢
深嘆忠勤念久去於周行適來還於翰苑宜陟春官之
長進聯八座之崇時屬多虞朝方右武軍旅以同邦國
亦惟爾職之脩方岳以朝諸侯更講時巡之制益殫忠
藎圖濟艱難可

鄭望之吏部侍郎制

勅唐制右列三銓掌於武部本朝肇分四選揔於天官
方時多虞尤號難治惟品流之麗雜貪患其多矧典籍
之散亡吏得以肆欲司厥事必惟其人具官某識慮精
明材猷敏濟頃郎曹之分職正戎馬之在郊奮身請行
抗節而出遂陟近班之峻以昭信誓之勞旋徇公言乃
從遠適茲召還於著位將協濟於事功俾叅常伯之聯
專掌武階之衆爾其糾摘真偽審覈條章人無滯留之
嗟吏絕欺罔之弊斯為稱職尚勉之哉可

劉珣吏部侍郎制

勅天官之選吏負猥衆簿書叢雜在承平時號為難治頃自巡幸浙右典籍多為煨燼凡在選之士自一命而上功罪履歷之實漫不可考自非精明吏治而習知其事者孰能勝斯任哉具官識度詳明政事練達居懷憂國之慮荐貢救時之言頃貳選曹僉謂平允分符出守曾未淹時宜還法從之聯復典中銓之寄爾其區別賢良糾正隱慝使吏無得並緣為姦時乃之休是為稱職

可

葉份戶部侍郎制

勅國家之務用度為急祖宗循五代之制總於三司元
豐復六官之聯歸於戶部比緣多故稍革舊章兵食所
資費出彌廣典領厥事實難其人具官某智畧䟽通材
資敏達荐更事任綽著能稱糾察省綱總臨漕運朕方
時巡江左式遏寇攘眷茲百萬之師奚止千金之費資
爾心畫以餉五軍擢參法從之班往貳地官之任爾其

裁制盈虛斡旋多寡使朕有足食足兵之信茲為稱職
尚勉之哉可

李迢除戶部侍郎制

勅文昌政事之本源民部財賦之管轄兼周官司徒司
會之職總唐室度支鹽鐵之權于時列曹號為劇任欲
貳厥事每難其人具官某智術週通材資夙給服勞郎
署已觀心計之良列屬宰庭克著聲猷之美干戈未定
調度方煩全師駐于會稽饋餉資于左戶俾陟貳卿之

峻往圖經費之充士飽而嬉無乏千金之用師直為壯
佇收三捷之勲尚悉乃心期稱朕命可

黃檠兵部侍郎制

勅國家自祖宗以來聚天下之兵於京師尺籍伍符付
之列將牙璋虎節祕在樞庭夏官所掌特其名與數而
已厥今國步方艱外患未弭五兵之寄視承平為重疇
咨庶位我得其人具官風力敏強性資超邁試之選部
而銓總平允列于宰屬而糾察嚴明遂進直於河圖俾

按臨於蜀道惜其遠去宜為朕留擢居法從之聯進參
帷幄之議朕方時巡江左式遏寇攘資爾謀猷濟予經
畫尚恢遠略庸報異恩可

陳邦光除刑部侍郎制

勅文昌六卿之貳品秩惟均憲部三典是司條章滋衆
矧在險阻艱難之際凡居論思獻納之聯思協公言必
圖夙望具官某論辯閎博問學淹通文足以廣國華材
足以通世務望之射策早擢於科甲主父奏書嘗嗟於

晚見遂陟西垣之峻旋臨南夏之雄無施不宜所居可
紀向召從於遠服趣來還於近班逮此造朝允符前席
宜輟司於國用俾總猷於邦刑傳古義以決疑其克修
於爾職有嘉猷則入告尚益究於乃心濟時多艱對予
休命可

鄭望之工部侍郎制

勅文昌為萬化之源水部掌百工之事雖繕修營造在
巡幸之日有不暇為而獻納論思凡侍從之臣悉資辰

告肆頒明命褒進邇僚具官某知銜䟽通材猷敏達荐
更事任綽著能稱當敵騎之濟河以單車而出使遂修
隣好峻陟近班逮信誓之載渝徇公言而遠適朕方時
巡江左式遏寇攘思得豪俊之人共濟艱難之運爾頃
緣使事能察敵情宜還持橐之聯俾贊籌帷之密濟予
經畫賴爾謀猷往稱茂恩尚恢遠御可

欽定四庫全書

大隱集卷二

宋 李正民 撰

制

鄭士彥除吏部員外郎制

勅天官之選吏員猥衆簿書叢雜在承平時號稱難治
自擾攘以來人懷欺誕吏緣為姦必得明敏之士以為
其屬爾材猷之美列職奉常進擢郎曹俾贊銓綜是為
高選其益懋哉可

張綱吏部員外郎制

勅文昌六聯兼總萬務而諸曹郎吏分職其間雖繁簡不同其選任則均也爾早以經術名冠多士書林省戶皆所踐更往佐天官俾司小選亟祗爾事嗣有褒陞可上官惜吏部員外郎制

勅吏部在南宮為眉目於選士為司命自國朝以來非名士不以居之比因典籍弗存而議者喜出新意因事立文承用多駁吏緣為姦不可勝誅非得儒學之士通

於世務者孰能舉其職哉爾文雅決科達於吏治學宮
策府皆所踐更往佐天官俾司小選汝其檢吏而勿縱
守法而勿拘使文書無滯留而銓綜平則予汝嘉尚有
褒寵可

張宗元工部員外郎制

勅具官朕比遣樞臣往將使指命爾由奉常之屬掌其
幕府文書之事乃能糾合士馬張其軍聲用酬宣力之
勤俾陟郎曹之秩是為高選其益懋哉可

沈與求兵部員外郎制

勅具官漢以尚書為中臺御史為憲臺二者地望略等
自唐以來南省為重國朝以臺察省雖任職不同其選
則均也爾以儒學之美列屬推彈議論慨然風采振起
為郎武部其職甚清往祗厥官嗣有褒陟可

韓裕兵部員外郎制

勅具官朕觀春秋之際列國公卿大夫之子孫咸以材
能表見於世朕甚嘉之爾名臣之後儒雅自將學以從

政有如寒士擢居郎屬用顯爾長往祇厥官嗣有褒寵
可

潘因刑部員外郎制

勅昔路溫舒惠治獄之吏以刻為明以為奏當之成雖
咎繇聽之為死有餘辜何則成鍊者衆丈致之罪明也
今朕設憲部之官以掌天下之奏讞務從寬恕又以爾
明察俾為之屬其深惟前載之言以廣吾好生之德則
予汝嘉可

惠柔民禮部萬格祠部並員外郎制

勅某官等文昌之政兼總治官宗伯之聯特為清選掌
南宮之章奏舉祀典之禮文列屬其間必求名士爾等
由庠序進以儒學稱宜參郎位之華往佐春官之長各
恭爾事勿替厥勤可

成大亨祠部員外郎制

勅文昌六聯分理萬務諸曹郎吏列屬其間雖煩簡不
同而選任均也爾以材猷早為憲部出臨漕計宣力惟

多還陟祠曹素號清選往修爾職其益懋哉可

王禹得禮部員外郎制

勅具官宗伯之屬掌禮文表奏之事號為南宮舍人自
非名流不在其選爾儒學操履見稱于時不忤不求恬
於進取其升華於郎位俾列職於春官益勵厥修嗣有
褒寵可

王昶駕部員外郎制

勅具官文昌六聯分理萬務自頃裁損溢員而郎選重

矣爾以強學待問名冠多士書林省戶皆所踐更譽處
既休器業彌茂惟輿輦車乘之政屬於武部職清而事
簡亦儒者之所宜居也今以命爾往其懋哉可

韓古都官員外郎制

勅都官之名尚矣在漢為司隸校尉之屬糾中都官不
法事自後凡盜賊臧獲部曲俘囚之事悉掌之于今為
刑曹之聯而職事視前世則簡矣爾以材猷荐更任使
其升華於郎位俾列屬於秋官往既乃心嗣有褒陟可

張閭等並諸曹員外郎制

勅張閭等文昌天府衆務衆數內外折衷遠近稟仰而
諸曹郎吏分職其間雖煩簡不同其選任則均也爾等
或以儒學進或以才能顯譽處之美有聞于時並趨丹
地之嚴往佐列曹之長各恭爾事勿怠厥修可

韓肖胄左司員外郎制

勅具官昔唐太宗謂房元齡曰公為僕射當廣訪賢材
比聞閱訟牒日數百豈暇求人哉因敕細務屬左右丞

大政乃關僕射今朕當艱難之時方以戰守大策責成
宰輔而左司郎官乃家司之屬也凡文昌細務宜悉以
付之則選任之意視平時為加重矣以爾名臣之孫踐
更省府老成練達裁剴詳明是用命爾以尚書左司之
事爾其彌綸省闥糾正紀綱使大臣不勞而庶事皆理
時乃之休嗣有褒陟可

張公濟除右司員外郎制

勅具官國家元豐中肇建文昌以六曹分總天下之事

而提綱提領實在都司必得明敏之士乃堪其選爾以
儒雅緣飾吏事練達世務僉謂老成久參郎位之華既
預列卿之貳比持使節士譽益孚其躋省闈之嚴以參
宰士之列是為遘東尚勉之哉可

李承造右司員外郎制

勅

上詞同

以爾名臣之孫聞見殫洽忠義之氣勇於敢為

是用命爾以尚書右司之事

下詞同可

管思可度支員外郎制

勅地官之職素號繁冗自頃裁損濫員而太府司農出納之數悉隸其間期會簿書視前日尤劇為之屬者可不遴其選哉爾樞臣之後材諳有聞久服官常所臨必最宜還郎位總覈邦財其既乃心毋乏吾用可

韓球度支員外郎制

勅其官古人有言曰千里饋糧士有飢色樵蘓後爨師不宿飽今朕命相臣提重兵以鎮撫建康又分遣大將戍守旁郡凡饋餉所須者博矣乃留掌計之臣專領供

億之務有請于朝以汝為屬茲命起之廬次列于郎曹
所以因爾之能而濟事功也其悉乃心往佐而長可

黃龜年除倉部員外郎制

勅具官古人有言曰雖有金城湯池帶甲百萬無粟不
能守也故用兵行師饋餉為急爾早以選擢嘗贊銓衡
材智之優宜膺任使載加召對敷奏可觀司庾民曹是
為劇任往修厥職嗣有褒陞可

程邁除太常少卿制

勅具官某奉常職典天地任兼禮樂凡歷代之沿革本朝之典故皆當深思而熟講之以參酌情文述作之本旨自非博習之士通于古今者孰能任之爾以儒學決科以文雅飾吏荐更劇任繼歷要塗比自螭坳復持使節宣勞于外亦既閱時茲用召還俾居秩宗之任斯為清選尚勉之哉可

陳戩太常少卿制

勅具官某昔齊仲孫湫適魯猶秉周禮知其未可動也

朕當艱難之際未嘗不謹于禮故比雖裁損溢員九卿之列皆罷而太常之官獨存焉豈非隆禮而重本哉爾儒雅自將操行無玷臺僚省戶皆所踐更其貳奉常以掌郊廟朝廷禮儀之事虞舜命九官于伯夷作秩宗曰夙夜惟寅直哉惟清蓋不如是不足以交神人也往祇爾職尚勉厥修可

柳約太常少卿制

勅記有之班朝治軍蒞官行法非禮威嚴不行蓋禮雖

治定而後制然治軍之間亦不可廢也朕遭時艱難講古巡狩而宗廟朝廷征伐軍旅之事凡繫于禮文者非一則率屬以任其職者可無其人哉具官某性資開敏學術深醇早勵猷為踐更臺閣比叅議于軍事遽書警奏殆無虛日雖遇盤根錯節迎刃而解朕用汝嘉肆命汝進貳于奉常以司贊導朕將觀汝之材而試用之矣昔祭遵為將雖在軍旅不忘俎豆矧汝以禮為職乎往祇厥官無忝朕之明命可

程邁除檢正制

勅具官中書門下機要之司給事中舍人皆為其屬然
列於從官各有職守糾駁諷議莫非朝廷大務至文墨
細故叅酌典法督責稽違者又不可以無其人此朕設
檢正以察諸房之事也爾儒學之美吏治之明有稱於
時見於已試踐更中外再至九卿茲用仍其舊職處之
宰屬是為高選其益懋哉可

周頴檢正制

勅具官朕循祖宗之法中書門下合而為一所以省文
書而壹統類也又命設官以糾察諸房之事如古掾屬
列于公府庶使大臣不勞心於細故而專意於機務之
大者非夫明敏練達孰宜任此哉爾儒學之美政事之
能有稱於時見於已試其由銓選之任俾贊機要之司
往其欽哉毋忝休命可

蔡崇禮除中書舍人制

勅西臺出令之原內史贊書之任自昔獨存于三字專

號詞臣于今分押于六曹兼總吏事擇人而授得士為
難宣教郎試起居郎綦某學富本元文兼體要既殫洽
于聞見亦明習于憲章省戶握蘭恬而自適螭坳載筆
動而必書比給札于尚方俾試言于右省落筆而觀者
如堵共驚倚馬之才終篇而紙價頓高深得演綸之體
肆揚成命進陟從班時方屬于艱難朕急圖于賢俊修
飾潤色允資播告之辭獻納論思更佇盡規之益往祇
朕訓無怠厥修可

李釜中書舍人制

勅政事總于西臺詔令掌之內史賞罰黜陟之柄既得
以與聞討論潤色之辭必資于行遠每難是選必得其
人具官經術邃深文詞敏妙儒科發策早居多士之先
選郎為郎固已歷年之久比列曲臺之貳浸躋柱史之
聯自密侍于軒墀嘗贊為子名命宜起祠庭之逸進參
法從之華時方屬于艱難朕急圖于英俊致治以得賢
為本當益勵于爾猷鼓衆以出命為先其不匿于朕指

往服予訓亟修厥官可

李公彥中書舍人制

勅西臺出令之原內史贊書之任自昔獨存于三字專
號詞臣于今分押于六曹兼總吏事擇人而授得士為
難具官學富本元文兼體要馳聲場屋早冠上游試藝
詞科復居前列遂預道山校讐之職縱觀策府奇異之
書滋博洽于見聞益沈涵于器業比還著位再貳奉常
命給札于尚方俾試言於右省肆揚成命進陟近班時

方屬于艱難朕急圖于賢俊修飾潤色允資播告之辭
獻納論思更佇盡規之益往祇朕訓無怠厥修可

洪擬起居郎制

勅具官某昔孔子作春秋於隱桓之際則彰於哀定之
間則微辭雖不同然記事之文不可廢也朕惟艱難以
來史失其職而著作之庭俄空焉撰述之官非左右記
注將孰任其事乎爾儒術資深議論持正橫經學省師
表克修執法臺端風節甚峻踐揚之久譽處彌高茲既

御於祥琴宜即還於朝著爾其載筆軒陛言動悉書無
曠厥官使論次者有考焉可

劉範起居舍人制

勅具官朕惟古之王者世有史官君舉必書所以慎言
行昭法式也左史記言右史記事帝王靡不同之頃自
艱難以來典籍或廢而不錄矧官弗備員將孰舉其職
乎爾學問通博質性淳厚嘗冠多士老於郎潛退處祠
庭安恬自得宜還朝序入侍螭坳爾其秉筆而書言動

悉載斯為稱職尚勉之哉可

董道徽猷閣待制與郡制

勅入持從橐出領藩符惟時邇臣宜膺異數具官某博
學而多識殫見而洽聞誦甘泉之遺儀如指諸掌記南
宮之故事不忘於心早擢秀於士林遂飛英於儒館荐
更郡寄復嘆郎潛浸陟九卿之聯迺躋二史之列遽以
疾諗丐于外遷宜升次對之班俾遂偃藩之逸往祇朕
命勿替厥修可

湯東野徽猷閣直學士知平江府制

勅分職六卿蓋重朝廷之體承流千里式隆屏翰之權
惟內外之勢既殊則名位之實必稱方膺委寄宜渙寵
章具官某器局靖深材資敏劭果藝以達得孔堂從政
之方經術而文繼漢儒飾吏之美荐更事任藹著聲猷
眷茲吳門乃爾舊治頃緣移蹕之務實繁先置之行賴
川願借于寇恂西河欣迎于郭伋俾即貳卿之秩仍紆
太守之章屬議臣之有陳稽舊典而或戾謂創開於近

比非增崇于本朝宜更延閣之班專布名藩之政矧吏民素遵于條教而關梁方謹于誰何尚悉乃心益觀來效可

王循友知建康府制

控江山之都會望莫重于陪京撫民卒之浩繁治必資于良牧非聲猷之素懋曷寵寄之兼隆以嗣雅亮不羣威寬有濟夙播儒紳之譽荐更省闈之華司列東銓常羽儀於禁路承流北固方屏翰于名邦嘉善政之流聞

宜雄藩之就陟任兼留鑰爾典其嚴地有宿兵爾為之
重懋乃藩宣之績體予眷倚之優可

陳邦光移知建康府制

勅朕省方侯甸移蹕近邦惟置器之未安念橐弓之無
日分屯師旅控扼襟喉爰求侍從之良俾任藩宣之寄
具官某謀議深博材資雋明早潤色于西臺旋鎮臨于
南服比朝行在進陟貳卿輟從荷橐之近班付以朱方
之巨屏惟時建業實古名都據吳會之要衝命相臣而

留撫資爾銜畧修彼戎兵宜折左符就更重鎮能通世
務儒者雖樂于有為思濟時危人臣固難于擇事圖稱
朕命益既乃心可

凌唐佐升職知應天府制

勅睢陽要衝宋臺都會實藝祖興王之地乃朕躬纂服
之邦爰擇守臣式隆委寄爾材猷之美風力之強將命
王畿聲績懋著其升華于延閣俾司鑰於留都爾其綏
撫疲民繕修守備思固吾圉以觀爾成可

李邴知平江府制

勅浙部奧區蘇臺重鎮當三江五湖之會多強宗大姓
之家民俗阜蕃食貨滋殖乃眷藩垣之任必資心膂之
臣爰渙茂恩式隆委寄具官某智周而材贍學博而聞
多愷悌足以臨民忠嘉足以謀國徧儀禁路殫論思獻
納之誠入贊政塗有同寅協恭之德比辭機務均逸祠
庭念王室多事之秋正大臣宣勞之日矧吳門之名郡
欲師帥之得人疇咨于朝肆以命爾朕心朕德夙惟左

金史卷二
右之親有社有民宜布朝廷之惠撫循良善摧抑豪強
尚既乃心圖稱朕命可

胡舜陟知建康府制

勅昔漢高守關中光武保河內皆深根固本以制天下
朕念中原雲擾未有旋旆之日惟建康實古帝王所宅
又為仁祖興王之國符朕躬潛邸之名形勝具存亦今
日之關河也付之守帥可不遴其選哉具官某智畧輻
湊材資雋明事不辭難勇於為義載惟是邦乃江左要

地是用命爾以二千石之重為朕守焉爾其修扞禦之
備勵水陸之師以保長江天塹之險無令敵人侵軼而
已勉之爾庸圖稱朕命可

葉煥待制知鎮江府制

勅价藩共理允資師帥之良延閣通班尤高次對之選
矧方思於固守宜增重於近邦將圖爾庸肆頒朕命具
官某性資爽邁風力強明荐更藩翰之符雅著循良之
譽官所居而可紀材無施而不宜比較漕權往分郡寄

朕念朱方之巨屏實居京口之要津宜升邇聯式隆雅望墜門曲格尚存鐵甕之高墉戰艦艤艫更講水犀之長技往服厥事益旣乃心可

陳邦光知鎮江府制

勅設官分職文昌為政事之源宣化承流刺史居吏民之表眷予近列方造明廷宜膺東求式分委寄具官某風猷英邁智畧深通彬彬徐幹之文纚纚馬周之論早被非常之遇驟更不次之遷荐析州符屢踰歲紀逮

來朝於行在俾進陟于貳卿念當戎輅之戒塗尤重朱
方之近屏地隆京口城迫江津惟武備之未修顧帥臣
之屢易與其持橐簪筆參茲侍從之班孰若繕甲治兵
固我封疆之守躋華延閣作鎮大邦允資材術之長實
出眷懷之厚佇觀來效庸稱戎恩可

胡唐老知鎮江府制

勅朕省方侯甸移蹕近邦惟置器之未安念橐弓之無
日分屯師旅控扼襟喉爰求侍從之良俾任藩宣之寄

具官某材猷敏劭識慮精深早更臺閣之華繼奉麾符
之守蕩平逋寇荐奏膚功遂進陟于近班仍易臨于重
鎮屬樞臣之將命顧幕府之須材載念朱方夙稱京口
適嚴武備已駐大將之鼓旗選東帥臣俾總連城之節
制允繁術畧協濟事功尚悉乃心圖稱朕命可

湯東野除待制依舊知平江府制

勅朕躬履至尊遭時多故師徒沸擾宮闈震驚非賴股
肱心膂之臣與夫藩垣屏翰之寄提兵入衛扶義抗章

孰能協濟而戡斯難哉具官某夙蘊智謀素懷節義使
華將命風力著聞郡國承流教條孚信比屬勤王之舉
載嘉宣力之勞盡瘁赴功竭忠衛社宜進從班於延閣
復仍舊治於蘇臺用昭慶典之行聿為有功之勸可

李貴遥郡刺史制

勅具官朕命樞筦之臣提兵扞敵軍功爵賞皆決於外
不從中御也剡章來上謂爾嘗有戰多之績而恩典未
稱是用命爾以遥刺之秩以為懋功之勸朕惟爾方執

干戈備戎行而強敵之侵暴未已。是汝立功名取富貴之日也。疇昔之勞賞既厚矣。方來之効爾其圖之可。

薛慶武功大夫忠州刺史制

勅上游之地素號繁庶。比經外寇。民物凋殘。而吏或拘於文法。不能為戰守之方。爾乃糾率兵民。繕修備禦。措置有緒。忠義可嘉。其峻陟於武階。仍遙分於郡刺。併以命爾。是為優恩。尚既乃心。益圖來效。可。

劉洪道知明州制

勅朕惟四明奧區西限重江東奄左海在承平之時號為
無事比因外敵馮陵移蹕於此事叢人衆供億蕭然非有
文武智術者不足以勝守臣之職也具官躬應務之材懷
御衆之畧頃守東秦屢摧強敵提兵遠涉紀律甚明山濤
暗合孫吳之言充國習知夷虜之事今干戈未定州縣多
虞爾其式遏寇虐惠綏黎元固城守明斥堠以制勝於
未形則所賴以為安者非特爾一邦而已可不勉哉

程邁集英殿修撰知福州制

勅具官福在東南為一都會俗兼甌粵之舊地有山谿
之險師帥之任豈不慎選哉爾以儒術之美政事之材
中外踐更譽處休顯比持使節往按列城宜躋論譔之
華資俾任藩宣之重寄外敵侵迫南土震驚其修扞禦
之方布撫綏之政庶臻嘉靖式寬顧憂可

權邦彥起復依舊知江州制

勅移孝為忠乃盡人臣之節斷恩以義盍先戎事之憂
我圖共理之良式舉奪情之典具官材為世用仕以學

優智名得之勇功文事兼其武備早更華序旋鎮邊陲
既委贄以造朝實毀家而殉國方賴干城之略遽興陟
謁之悲朕惟墨以臨戎晉侯能達禮之變經而從政閔
子得事君之宜俾節抑於苴麻亟親臨於金革允資千
里之寄靡待十旬之淹王事不以家辭魯史著為明訓
長吏難以憂去漢法載其舊章勉迄爾庸思稱朕命
可

曲端知渭州制

勅陝右奧區平涼古郡統制夷落表裏關河宜得爪牙
之臣往任藩垣之寄具官材資宏毅智略深沈學通玉
帳之奇氣稟金方之勁早共武服屢積戰功比統率於
西師以緝綏於陝服朕念關中之險固實為天下之本根
士馬精強歌謠慷慨稍失藩籬之守半為虵豕之場宜
糾合於隣邦力恢復於列郡自頃連帥之職靡親行陣
之臨方時多虞豈遑自逸凡今警急之報尚何文法之
拘援桴鼓以祖征冀旌旗之改色永清全雍以濟我師

其益勵於壯猷用欽承於遠御可

趙令歲起復黃州制

勅具官列城共理國之藩垣要經從宜理有權變方遭
時之右武斯以義而斷恩爾頃執親喪乃辭王事顧黃
陂之支郡亦淮右之要津欲扞侵凌當圖備豫宜服晉
侯之墨往分漢守之符勉修厥官思固吾圉可

又直龍圖依前知黃州制

勅具官昔唐天寶之際張巡許遠守睢陽身殞而名傳

薛愿守淮陽城全而事不顯杜牧乃有良臣不如忠臣
之論頃自擾攘以來敵國內侵寇盜充斥二千石能保
其城郭者鮮矣爾以宗室子任符竹之寄忠勇自奮脩
禦有方身被重傷誓以固守保全城壘民賴以安乃俾
進直河圖以為爾寵所以勸良臣也尚勉之哉聿觀後
效可

晁公為直秘閣知台州制

勅朕惟東粵之壤民物康阜凡在守臣尤加遴擇爾雍

容文雅譽處甚休進直中祕之嚴往蒞名邦之寄有民
有社尚勉之哉可

謝克家徽猷閣學士知泉州制

勅設官分職文昌為政事之原宣化承流刺史乃吏民
之表匪時賢德曷稱選掄具官造道深醇秉心端亮既
孜孜而奉國每惓惓而納忠上庠居師儒之官西省聯
諫諍之列遂徧更於華要旋出殿於藩垣召自南邦進
躋八座方資辰告乃以疾辭升延閣之崇資鎮溫陵之

金史四庫全書
卷二
巨屏宣揚惠澤撫字遠民尚既爾心圖稱朕命可

宋彥通待制知筠州制

勅承平之世朝廷尊榮人樂仕進則所重在內多事之
日州郡間暇人思遠去則所重在外昔人或起登仙之
羨或恨得地之晚也具官材資敏達識慮精深列職郎
曹聲猷克茂司刑卿寺讞議惟明奉使節而出疆屬戎
車之在境能達國命式遄其歸俾仍延閣之班往蒞一
邦之寄爾其布宣惠澤撫字遠民無以暇逸自居是為

稱職可

李鄴待制知越州制

勅

上詞同

具官材猷敏達識慮精深素懷忠義之心習知

邊鄙之事宜和之李亭瑛弛嚴方萬騎之濟河以單車
而出境未明信誓復應詔音慨然請行載馳使傳能達
國命式遄其歸俾仍延閣之班往蒞大邦之寄廣宣惠
澤鎮撫列城無以暇逸自居是為稱職可

商守拙知筠州制

勅次對西清持從臣之橐承流列郡分刺史之符爰眷
賢勞肆頒朕命具官禔身無咎秉德有常既砥礪於材
猷亦明習於文法比繇廷尉進貳秋官屬就領於真祠
俾刊修於挈令力祈外補蓋亦重違其綰郡章俾從爾
志宣布朝廷之惠往安閭里之民可

許中知桂州制

勅具官桂林大邦湘南都會師帥之任尤難其人爾博
涉藝文通達吏治校讎儒館多所見聞踐歷郎曹已稱

彊敏茲承流於江表乃聞問於朝廷其升延閣之華資
俾鎮南荒之巨屏自昔夷獠之俗每患於難安惟時方
面之臣必先於無擾服我明訓往其欽哉可

林適待制知福州制

勅東甌故區福唐都會旁連百粵兼總七閩在治安之
時鎮臨為重當擾攘之際撫馭尤難宜擇近臣往分委
寄具官材猷通敏學術淹該以文章成名居多傑思用
儒雅飾吏藹著能聲比殫潤色之勞願就詞廷之選朕

念南方之巨屏荐更赤子之弄兵溪山阻深民俗剽悍
思得賢守安而治之惟爾久在里閭身習知其情偽嘗
持使節下亦服其教條宜剖左符往諭朕指尚圖來效
庸稱朕恩可

柳約直龍圖閣知吉州制

勅朕惟吳越之壤民物阜蕃凡在守臣尤加遴選爾儒
學更能見稱於世踐更臺省貳于奉常乃俾直河圖付
以郡寄朕擇人共理之意厚矣其茂承之可

范致虛知鼎州制

朕惟式遏寇虐康濟艱難當饋興嗟豈必借賢於異代
若古有訓亦惟圖任於舊人眷茲師帥重權宜畀廟堂
夙望爾智博而材瞻文麗而學優守節不渝嘗聞汲黯
之好直因時或異遂見徐公之有常協贊機衡斯謀必
告荐臨方面靡勞弗宣茲趣召於遐陬俾來朝於行在
德與年而彌劭志雖窮而益堅還秘殿之華資以彰體
貌領殊庭之館御庸便咨詢迺慷慨以有陳願馳驅而

自効惟荆楚之奧壤實夷獠之與鄰方賴老成重煩鎮撫杜詩在外乃心不忘乎朝廷申伯于蕃王室允資其屏翰往祇朕命尚遠乃猷可

李釜待制知筠州制

勅次對西清持從臣之橐承流列郡分刺史之符諒匪時髦曷膺寵數具官文兼體要學富本原早居多士之先寢為當世之用惟踐敷而滋久顧譽處以彌休比擢置于西垣俾典司于外制而乃固形辭避至於再三其

班延閣之華往蒞名邦之寄宣揚惠澤撫字遠民尚悉
乃心圖稱朕命可

季陵復待制知温州制

勅朕惟浙東之壤民物阜康凡在守臣尤加遴擇具官
文辭典麗經術深醇早奮勵於材猷久踐更於臺閣守
官柱史夙推載筆之辭書命掖垣深得代言之體眷永
嘉之支郡實負海之名邦時屬多虞允為寄重宜還次
對之秩往奉藩宣之行爾其扞禦侵凌消弭盜賊俾爾

四封之內自臻比屋之安尚悉乃心圖稱朕命可

董道知信州制

勅次對西清持從臣之橐承流列郡分刺史之符諒匪
時髦孰膺寵數具官材猷博敏學問淹該出典藩垣惠
昭民譽入更省寺望普朝端宜陟近班俾膺郡寄往繼
循良之治廣宣德意之孚可

連南夫知饒州制

勅名藩巨鎮在金盛之日並列於方維通邑大郡自艱

難以來半罹於兵革凡茲易地而處必曰度時之宜靡
有重輕式均委寄具官風猷凝粹學術深醇早擢殊科
遂躋儒館逮專對於絕域旋聯華於從班出守淮邦閭
里有安居之適奉迎戎輅儲峙無告乏之憂載念爾勞
易臨便郡朕惟黃霸之治稱於潁川公綽之材優於趙
魏往祗休命益究爾能可


劉洪道知楚州制

勅朕惟敵國內侵兵無寧歲寇攘競擾民靡奠居念齊

魯之邦已悉懼於塗炭惟淮楚之壤當益固於藩籬爰
得能臣俾膺郡寄具官猷為敏達學術詳明早踐儒林
寢躋郎選向結倚廬之戚適當戎事之興乃析左符俾
守爾土智足摧夫強敵材堪制夫勁兵方屬盛秋就分
近屏眷茲望郡俯控長川是謂可為之時矧曰必爭之
地淮甸既倚之為輕重江吳亦視之以安危尚悉乃心
思固吾圉可

張汝舟除直顯謨閣依舊知明州制

勅具官國家肇建延閣以奉祖宗謨訓翬飛跂翼列于
西清乃俾搢紳之士寓直其間以為儒者之高選部使
者二千石有治理効輒畀以美名所以示勸也爾儒學
吏事有稱于時頃自臺僚出分符竹鄞江之政亦及晷
年治行有聞辦事不擾進躋華職用獎爾勞增秩賜金
無愧於古盍思報稱尚勉之哉可



欽定四庫全書

集部

大隱集卷三
四

詳校官左中允_臣 瑯五珠

主事_臣 呂雲棟覆勘

欽定四庫全書

大隱集卷三

宋 李正民 撰

制

劉珪權知三省樞密院使制

勅朕遭時艱難法古巡狩念長樂六宮之衆必安處于
善邦惟百司庶府之繁難久稽于常務思講變通之策
預圖忽眇之幾欲寄朝綱式資時傑具官性資忠厚識
度詳明行已過乎古人言有補於當世徧更兩省殫獻

可替否之忠進總三銓著激濁揚清之譽朕惟江表之
寄實均廊廟之權思得老成共釐邦采矧踐揚於臺閣
仍久習於憲章特陞祕殿之華資俾視政塗之寵數載
隆衆望允出朕懷奉東朝之尊宜益嚴於羽衛總行臺
之政當躬治于文書時乃之休寬予憂顧可

滕康權知三省樞密院制

勅

上詞同

具官材堪大受學富多聞厚德足以鎮浮懿文
足以華國徧儀禁路殫獻可替否之忠入贊樞廷有厭

難折衝之畧比分江表之寄共持廊廟之權念久服於股肱實備昭於悃懃載隆柄任允出朕懷奉東朝之尊宜益嚴於羽衛總行臺之政當躬治於文書時乃之休寬予憂顧可

張守簽書樞密院制

勅天下之兵至衆操柄必在於朝廷堂上之奇無窮勝算莫先於樽俎朕紹承令緒思濟多艱念匈奴之日驕歎得臣之猶在爰圖髦傑入贊樞機具官靖深而能謀

端方而不撓智足以知當世之取舍學足以造古人之
淵源久總臺綱實參國論遠矣君子之慮利哉仁人之
言磨涅不能磷緇剛柔無所吐茹屬樞廷之虛位眷詞
禁之得賢與其因筆墨以成文發予號令曷若運帷幄
以決勝修我戎兵特躋祕殿之名兼峻文階之序進聯
宥密協濟事功噫上兵伐謀靡待干戈之用真儒無敵
允資德義之修尚遠乃猷圖稱朕命可

陳思恭轉遥郡團練使制

勅具官周官司勲之職凡賞無常輕重眎功朕於勤王之賞已加厚矣其有拘於彛制而未盡者豈所以示勸哉爾見義敢為臨機必斷移檄以令近郡率師而當戎行已進陟於武階仍遥陞於郡寄益殫忠蓋圖報恩榮可

俞儋遥郡團練使制

勅具官出納之吝謂之有司然必得其人乃可以舉職也以爾材力掌吾外府之事而究心夙夜克修厥官會

課當遷既有常法俾尚仍於舊貫特升秩於州團益勵爾為圖稱朕命可

劉鍾贈團練使制

勅殉義忘生乃見忠臣之節捐軀扞敵宜膺國典之褒
具官早服戎行克宣勇力冒鋒鏑而弗顧履行陳以無
前勢既屈於豺狼身遂膏於原野載嘉爾烈深厯朕懷
特陞左武之階仍領遙團之寄庶幾英爽尚克欽承可

胡舜陟水軍措置使制

勅肄習舟師屢更使任未見久長之策已當危急之秋
宜得其人俾司厥事具官材猷敏給識慮精深振職臺
端風采行於百辟承流方面威望著於列城三載服勞
羣盜屏迹比覽奏封之來上深嘉論議之堅明更畀
權旋頒召節載念戈船之利實防天塹之津謂爾智之
有餘驗爾能於已試歷選在服莫如汝諧仍延閣之近
班總水犀之長技往祇朕命益究乃心可

王義叔水軍措置副使制

勅朕式遏寇虐經營四方少安警蹕之行周覽江山之
勝俾修守備當擇其人具官識慮精深猷為敏達著君
卿行能之美實山東禮義之家早歷郎曹遂躋禁從久
辭著位退處燕閒朕肄習舟師屢更使任未見久長之
策已當危急之秋歷選於朝肆以命爾總水犀之節制
扞天塹之要津其既乃心亟圖厥事可

杜充宣撫使制

勅安強成道德之威莫先於正本折衝在精神之運尤

貴於擇人朕遭時艱難法古巡狩暫駐江左式遏寇攘
方倚用於耆英往控臨於淮甸宜正使名之重以光閭
寄之雄具官莊重而淵深剛方而宏毅厚德有鎮時之
望沉謀燭先事之機比守兩都盡消羣盜吳漢隱若敵
國民賴以安李勣賢於長城寇莫能犯輟司留鑰入贊
籌帷逮來對於便朝實副懷於虛佇人皆欣見其風采
朕亦深挹其謀謨茲屬盛秋當嚴武備仍總樞機之柄
亟驅徒御之行增重使權益隆節制式符衆望庸示眷

懷噫光弼之號令一新旌旗改色萬福之威聲夙著草木知名往勵壯猷圖稱休命可

周望宣撫使制

勅決勝千里允資帷幄之謀宣力四方必賴股肱之助眷予樞輔總國兵機思遠振於軍容俾暫將於使指具官中正不撓宏毅敢為卻穀旣說於詩書翁歸兼備於文武單車出使屢通鄰國之情十乘前驅實仗元戎之畧旣克平於逋寇益增重於威名遂躋常伯之聯進陟

中樞之峻朕念江漢上游之地是為荊楚四戰之郊宜
乘輅傳以按臨悉總連城之節制擊楫而濟祖述奮威
於中原抵几以行公瑾收勲於赤壁聿臻綏靖式佇旋
歸可

宋輝直龍圖閣發運副使制

勅朕惟江淮六路財賦之淵藪而發運使副實總治之
自外敵馮陵移駐江左仰給調度視平日為多而懋遷
有無於一時為急欲任厥事可不惟其人哉爾材力强

敏心計精明事不辭難所臨必最舳艫應募則千艘畢
集轉輸浮海則萬斛安濟已試之效卓然可觀是用命
爾進直河圖以總東南之漕計爾其究心乃事濟時多
艱益著爾勞思稱朕命可

李承造兩浙轉運使制

勅朕惟吳越之壤民物阜康惟茲戎輅巡幸之時尤重
外臺轉漕之寄爾才資明敏智畧周通比由宰士之聯
往涖名城之守

以下原
本缺

成大亨直祕閣兩浙轉運使制

勅具官外臺轉漕之權制部富實之境衣冠避地流寓
為多警蹕省方仰給者衆孰膺遴選宜得能臣爾早涉
藝文尤通吏治久服勞於州縣既擢位於郎曹譽處彌
休安恬自得俾直圖書之府往臨吳越之區非威望不
足以厭服姦萌非清裁不足以表率羣吏貢賦無追科
之擾關梁有捍禦之方往體訓言是為稱職可

蘇恪廣東轉運使制

勅朕惟五嶺之南去朝廷遠甚官多假版吏緣為姦思
得忠信之臣往將使指爾材猷明敏列職郎曹服采惟
勤聞譽休顯持節南粵宜為朕行使民情上聞惠澤下
究斯為稱職尚勉之哉可

姜仲謙起復湖北轉運使制

勅人子執親之喪三年不從政然金革之事無避也朕
屬時艱難思與四方之士共圖康功可不變禮以從宜
哉爾風力強明材猷敏濟荐更使指咸以能聞比以首

衰乃辭王事朕惟荆湖之沃壤實連江海之上游控扼
輸將于今為重宜起倚廬之戚往持漕運之權其旣乃
心亟圖厥事可

上官愔除直祕閣京畿運副制

勅具官昔榮夷公好專利而王悅之芮良夫知王室之
將卑以為王人者導利而布之上下者也而或專之其
害多矣朕念掌財計之臣務以聚斂趣辦或者取羨餘
以市恩其能捐橫斂恤民隱為朝廷布仁義之澤者幾

希爾將漕王畿論事有體乃能奉朕寬恤元元之意丐
罷苛擾刻剝之令於用度殫屈之時朕甚嘉之其升延
閣之班仍正使名之重將以風厲四方使刻削之風丕
變而吾凋瘵之民庶乎少休息矣清資顯秩於爾何愛
焉可

張徵知江州充江南東路制置使制

勅潯陽古郡據上流之地在東晉時號為重鎮非宿望
大臣不以居之朕今時巡江左式遏寇攘繕甲治兵以

張軍勢匪我舊輔孰付帥權具官風格方嚴器宇渾厚
代言西掖潤色居多執憲中司糾彈甚峻逮茲南渡進
總右綱方賴協恭之誠遽陳均逸之請朕命四鄰之舊
任重股肱矧茲多難之辰憂深屏翰爰分符竹之寄俾
捍江湖之衝加畀使名庸示眷倚欽予時命益勵遠猷
可

中大夫起居舍人趙綸除右文殿修撰知慶元
府兼沿海制置副使制

千里曰畿莫重甬東之鎮八命作牧爰咨螭右之英論
撰通班藩宣示寵具官某才猷闕碩德望峻清正直靖
共確乎有守進退出處付之無心自疇庸於外臺肆陟
明於武監豸冠正色糾察官邪鯁論犯顏維持國是身
方居於要劇志每尚於清高侍立記言引之自近直前
奏事深所願聞厥今四明視漢三輔惟制閫有營壘甲
兵之衆惟相卿有衣冠閱閱之多乃睠老成是資鎮撫
德威遠暨自令瀚海之無波聲迹相聞尚冀京師之蒙

福式稱予選益懋爾庸可

劉舜文防禦使制

勅朕遏寇虐以綏疲瘵之民厚爵賞以勸忠勤之士覽
奇功之來上宜異等以疏恩具官久踐戎行克共武服
屢底戰多之最荐膺懋賞之褒威名旣立于淮邦績效
未書於盟府爰正有司之誤載酬馬柵之功增重使名
用昭禦侮往祇朕命益勵爾庸可

喬仲福左武大夫遙郡防禦使制

勅朕躬履至尊遭時多故孽臣騷擾反易天常實賴熊
羆之士不二心之臣糾合戮力克清大憝肆頒國典用
答殊功具官拳勇有聞忠誠自許荐更武服屢奏膚功
比屬勤王之行實嘉宣力之著躬率虎士先驅顏行宜
仍左武之班進領禦戎之寄茲為異數益勵壯猷可

王罕贈觀察使制

勅徇義忘生乃見忠臣之節捐軀扞敵宜膺國典之褒
具官某久服周行克宣武力頃總戎於畿右適遇敵於

淮西授兵登陴旣勵三軍之氣蒙楯負羽孰當強敵之
鋒孤堅不支摧陷以歿載嘉爾烈深盡朕懷俾遙領於
廉車仍就升於顯秩併隆恩典用慰存亡想爾冥靈欽
予休命可

賈讜換觀察使制

勅君臣之義險夷當秉一心立國之方文武固無二道
適圖守備宜越常規具官某風力強明材猷敏劭早聯
儒服亟踐周行浸躋華近之班屢典劇繁之寄比繇廬

次昇以使權扞天塹之要津總水犀之節制輟以從橐
易處廉車其躬屬於戎韃以總臨於戰艦往祇朕命益
旣乃心可

奉聖旨內侍鄭謹恬退自守不妄干進特除和
州觀察使制

昔者先王以德詔爵以為兩者皆天下之達尊必惟其
人而後稱君唯曰天命臣唯曰德賞則上下不敢以輕
而民服具官某恬於勢利不妄進取夫以左右近習之

臣而有廉節自喜之行固朕之所嘉予也陟汝廉車以勸在位使汝德稱其服而人浮於食也不亦於汝安乎可

皇兄沂州防禦使權主奉吳王祭祀多才磨勘轉明州觀察使制

勅朕崇長宗支以綿帝繫高爵厚祿宜與共之而猶計歲課勞循次而進所以昭至公謹成憲也具官某信厚以為質靖共以自將入不恃家人之恩而出無違闕庭

卷三
之禮況以尊屬于今幾人則徑陟廉車云誰不可而必
中有司之度積十年然後進之豈朕有所愛哉然而身
無吏事之責秩比法從之崇其視匪躬盡瘁沒齒下僚
者又何其幸也宜對殊渥無忝所生可

湯東野降官制

勅刑辟所繫雖有司存州郡之權悉歸長吏倘容越逸
難追譴訶其官頃以材能躋以侍從惟茲警蹕巡幸之
地實同輦轂浩穰之區賴爾強明俾之兼治凶徒縱脫

實典獄之庠官譏察閭疎乃自陳其曠職用示防奸之
戒耶從降秩之科往既乃心益圖來效可

田思邁襲封溪洞都督首制

勅春秋列潞子之爵許其慕中夏也爾父世守邊隅克
謹侯度剡章來上以老自陳溪山故封俾爾承襲爾其
敬念忠孝之義永為封疆之臣無忝乃父之訓以欽服
朕命尚其勉哉可

周離莠直祕閣轉運判官制

勅具官朕惟仁祖時尤重東南漕路漕運之職乃命施
昌言許元為之使又命馬遵為判官三人者其才足以
相濟能叶于厥賦是時人不告勞而財賦充足朕甚嘉
之以爾學問甚富材力有餘早踐郎曹嘗升柱史比列
地官之屬允資心計之良宜直秘嚴往圖邦用能通世
務儒者雖樂於有為思濟時危人臣固難於擇事佇觀
成效無愧前修可

董道贈官制

勅朕待遇臣工務全終始遽起淪亡之嘆可無褒贈之
恩具官早負時名亟躋儒館嗜學至老而不厭所聞既
博而愈精未嘗枉道以徇人故每進寸而退尺晚記言
於柱史浸聯華於從班方俾分符俄聞易簀宜優加於
卹典仍峻陟於文階庸示盡傷併推餘澤尚其靈爽歆
此寵休可

徐處仁贈官制

勅秉鈞當軸嘗宣力於邦家隱卒崇終宜疏恩於泉壤

乃眷我朝之舊弼未膺身後之餘榮厥有典常式隆著
位具官忠厚廉正靖深簡夷學造古人之方材周當世
之務徧儀禁路兼嚴樂侍從之能屢典藩符擅冀黃政
事之美靖康有作寇難方滋首擢冠於機衡遂再安於
龜鼎總領衆職已聞魏相之有聲鎮撫四夷方賴陳平
之多智懇辭魁柄退處祠庭遽興愍遺之悲莫逮親臨
之禮爾孤有請令德未忘升特進之崇階示褒賢之異
數庶幾英爽尚克歆承可

沈思贈官制

勅朕待遇臣鄰務全終始遽起淪亡之嘆可無憫惻之
恩具官夙勵材猷浸躋華近代言西掖早殫潤色之勞
均逸琳宮自得燕閒之適稍淹歲序未究設施顧逝川
之弗留嗟易簣之何及宜加卹典厥有彝章俾超進於
文階用增光於幽窆靈而未泯尚克欽承可

魏憲贈父制

勅朕躬執珪幣祇見郊丘逮釐事之告成肆湛恩之溥

及眷予近列宜有寵章迺推本於所親用追榮其先世
具官父某躬懷德義性服典常沈于下僚未完遠業不
顯子孫之餘慶遂為富貴之大家服在邇臣實汝賢嗣
荐舉褒揚之典已躋通顯之班屬禋祀之肇修乃弟昆
之有請載遷峻秩用賁幽局尚想冥靈欽承休命可

贈母制

勅朕躬執珪幣祇見郊丘逮釐事之告成肆湛恩之溥
及眷予近列宜有寵章迺推本於所親用追榮其先世

具官母某氏秉心淑慎迪德溫恭宜其家人克昌厥後
丕顯子孫之餘慶遂為富貴之大家服在邇僚實汝賢
嗣荐舉褒揚之典已膺休顯之稱禋祀肇修弟昆有請
載錫小君之號俾開名郡之封尚想冥靈欽承休命可

封妻制

勅朕纂紹丕圖欲修禋祀舉三歲之大典以初為常施
四海之湛恩無遠弗届眷予近列宜有寵章肆推家室
之榮以示閨門之慶具官妻某氏溫恭淑慎柔閒靜專

生于名門來嬪令族輔佐君子克勤厥家早開石窀之
封已侈綸衣之貴載疏國典式示朕恩往修中饋之恭
更勸南山之義欽予時命永建乃家可

鄭樞密封贈曾祖制

勅古者公卿大夫皆有廟以祀其先而視名位之高下
為多寡今朕推褒崇之典以觀在列亦因爵秩之隆殺
以差遠近惟執政大臣迺得追榮其三世則待遇之禮
亦云厚矣其官曾祖某積德累行晦于邱園流澤之長鍾

於後裔贊我樞府惟爾曾孫遭時艱難能任重大茲屬
延登之始宜疏休顯之恩超進文階以為爾寵靈而有
識尚鑒之哉可

贈曾祖母制

勅婦人正位乎內有全德懿行之美無以自表暴於世
惟其宗族之盛子孫之賢有聞于時浸以昌大雖乃祖
乃父積累之慶抑其內德之茂蓋有助焉具官某曾祖
母某氏柔閒靜專克配君子宜其家室胥及逸勤流澤

之長克昌厥後贊我樞府惟爾曾孫遭時艱難能任重
大茲屬延登之始啟以大邦之封靈而有知尚克歆享
可

贈祖制

勅傳稱商俗尚神說者或譏焉然盤庚之遷都告其羣
臣以災祥禍福之降未嘗不以乃祖乃父為言則廟祀
之禮褒封之典歷世修而兼用之豈特為虛文而已哉
具官祖某潛德弗耀積善彌彰行義之修稱于鄉黨厥

躬弗有施及後昆惟爾賢孫贊我樞府茲屬延登之始
併疏褒顯之恩超進文階用光寔窅靈而有識尚克欽
承可

贈祖母制

勅自秦漢以來婦人或裂郡縣以稱君湯沐之奉與列
侯比近歲分八等之封以易郡邑之號雖曰彌文蓋亦
美稱也以為閨門之寵光實兼古今之令典具官祖母
某氏溫恭淑慎宜其家人婦德之良稱於宗黨厥躬弗

有施及後昆惟爾賢孫贊我樞府茲屬延登之始併疏
褒顯之恩啟封大邦用光寔靈而有識尚克欽承可

贈父制

勅古者子為大夫父為士則祭以大夫而服以士蓋服
不敢以子之貴而加於父也今之士族子貴且顯矣父
之爵秩或弗至焉則非所以慰其心此朕推褒封之典
以及其先有不宜緩者也具官父某躬秉德義性服典
常流澤之深施于後裔惟爾賢子贊我樞庭禦侮折衝

方資廟算顯親報德式稱孝思超進宮師以錫爾寵丕
昭有後之慶蔚為窈窕之光冥漠有知尚其歆享可

贈母制

勅人子之於親雖三牲之養未足以為孝惟立身行道
揚名於後世以顯父母於是為至然自彤管女史之職
廢而純德懿行之美不傳於時惟觀其子之賢世昌以
大則母之德可知矣是可無褒顯之恩哉具官母某氏
溫恭淑慎克勤厥家輔佐嚴君乃有賢子贊我樞府為

時名臣爰於試用之初併舉疏封之典俾開名郡加賁重泉冥漠有知尚其歆享可

封妻制

勅夫貴於朝妻榮於室古之義也然執政大臣方盡瘁於國事而家事有弗及知焉矧當艱難之時類皆以身從朕於干戈之際則壺內之寄必有賢德之助可無褒異之典哉具官妻某氏柔惠溫良克佐君子贊我樞府為時名臣爰於登用之初併舉疏封之典乃啟大郡

以為爾榮尚祇服於寵光益克羞於饋祀可

王參政贈曾祖制

勅朕惟王氏遠有譜系而望出太原瑯琊者遂獨盛於天下自秦漢以來世為將相大家淮水之占尤盛於東晉逮我國朝凡元功宿將多其苗裔雖受姓名或不同然其源流之盛遠矣具官曾祖秦國正懿之孫鄭國恭肅之子鍾英令族為時聞人質儉自將弗流於驕侈剛介特立靡惰於燕閒垂訓義方乃有賢子名繼登於

科甲已安享於壽康雖躋環衛之官未究清芬之選參
吾大政實爾曾孫爰於登用之初誕舉褒崇之典正位
宮保光賁泉局以彰積善之家以示君子之澤庶幾英
爽服此寵休可

贈曾祖母制

勅朕惟唐室之制宰輔封贈不過其父故權德輿自東
都改葬其先始求贈祖以五品之秩亦未嘗極保傅之
位也國朝加禮大臣務隆恩典名器之大必上及於三

世禰翟之貴亦光施於有家待遇之意可謂厚矣具官
曾祖母某氏柔閒靜專溫恭淑慎生於貴族來嬪大家
風行閨壺之間惠浹宗姻之黨乃生賢子子又有孫為
吾政事之臣事朕艱難之日國方圖於協濟爾宜極於
褒榮特開名郡之封載錫小君之號庶幾冥漠服此寵
休可

贈祖制

勅昔漢世祖中興不以功臣任事故高秩厚禮允答元

功峻文深憲責成吏職於是鄧禹教授諸子各守一藝
賈復之徒並標甲兵崇儒學然後守成之業茂焉國朝
修文偃武元功宿將皆教子孫以詩書而鴻儒碩學之
士接武于朝者衆矣矧其流澤之長世昌以大是可無
褒異之恩哉具官祖承勲門之後蹈儒者之風下帷潛
心講誦大業躬稟義方之訓顯登甲乙之科受知公卿
宜居館閣黃香博上之舉當接武於俊遊祁奚內舉之
親終引嫌而補外屈臨別乘旋剖左符弗有於身慶鍾

厥後參吾大政實爾聞孫爰於登用之初誕舉褒崇之
典東宮三少位極顯榮聿為窳窳之光丕顯子孫之慶
靈而有識尚或欽承可

贈祖母皇甫氏制

勅婦人正位乎內雖有全德懿行之美無自表暴於世
惟觀其子孫之賢浸以昌大雖乃祖父積累之慶而內
德之茂蓋有助焉具官祖母某氏秉柔懿之姿躬婉婉
之行生於貴族來嬪大家有士而良服采朝列流澤浸

遠積善彌彰惟爾賢孫參吾大政國方資於協濟爾宜
極於褒榮俾開名郡之封載錫小君之號靈而有識尚
或欽承可

贈祖母韓氏制

勅

上詞
同前

具官祖母某氏秉柔懿之姿躬婉婉之行生於

貴族來嬪大家被賢王訓育之恩著婦德慈祥之譽均
一之美旣顯饋祀之職惟恭克勤厥家以相君子流澤

浸遠積善彌彰

下詞
同前

贈祖母來氏制

勅

上詞同

具官祖母某氏躬淑慎之姿服組紃之事克婉君子勤於厥家裴秀之譽早聞王符之書既顯訓於賢
息罔有逸言未開石窹之卦每結寒泉之念躋華近列
惟爾有孫早推天支就傅之恩允愜前人追封之志始
頒恩典未極褒崇茲進服於政塗方參毗於國論乃即
登延之始併推加贈之文升榮號於小君啟新封於名
郡靈而有識尚克欽承可

贈父制

勅昔漢張湯杜周並起文墨小吏致位三公皆有賢子
德器自過繼踵將相遂為世家史臣乃謂元功儒林之
後莫之能及然自我國家奄有區夏宗工名臣軒冕相
承大抵皆元功儒林之後豈遽不及文墨吏哉具官父
某嗜學弗厭執德不回仲舒究天人之原晁錯明國家
之體雖沈英於州縣乃馳譽於朝廷嘗被名卿之薦論
莫遂謹言之訪對厥躬弗有施及後人以文學嗣其家

聲以材德進為時輔參預大政康濟多艱爰於登用之初誕舉褒封之典式揚先德進位宮師以彰積善之符以顯儒家之慶英靈未泯休命其承可

贈母制

勅古者君子之仕也三釜及親則足以樂至於千鍾弗泊則其心悲蓋父母之德欲報罔極已則富貴而親弗逮焉此人情之所甚戚也宜有褒崇之恩以慰霜露之感具官母某氏秉賢淑之姿躬婉婉之行動不違於矩

獲性自樂於組紉生於名門來嬪甲族愛子益嚴於慈
訓趨庭弗假於義方是徵令息之賢早著上庠之譽徧
儀禁路為時名臣參華政事之聯實朕股肱之輔登用
茲始恩典併加式彰聖善之規特錫小君之號啟封名
郡增賁重泉尚想冥靈欽承休命可

贈故妻制

勅邦君之妻各因其國而稱曰夫人古也未嘗裂郡縣
以表之自秦漢以來湯沐之奉與列侯比至於金印紫

綬文軒丹轂顯於當世蓋所以寵勸臣下者如此雖曰
彌文亦不可廢也朕兼歷代之制以修褒封之典則燕
及其私庭者顧不厚哉具官妻某氏溫恭淑慎嚴格靜
專克勤厥家以相夫子降年不永弗逮顯榮宜疏名郡
之封載錫小君之號副之鈿軸賁于泉扃尚想冥靈欽
予休命可

封妻制

勅朕嘗觀名南之化始於諸侯大夫之妻修德循禮不

失法度其效見於人倫既正朝廷既治夫形於國者如此則施諸家者其勤亦至矣今吾政事之臣修身齊家以致祿位則盥饋在中必有其助是可無褒顯之恩哉具官妻某氏柔明淑懿婉婉靜莊生于名門來嬪令族輔相君子為時良臣參華機務之聯實朕股肱之佐方亟圖於王事靡暇及於私家壺則具修繫爾內助載錫小君之號俾開名郡之封永保寵榮稱予休命可

劉棐復官制

勅具官數赦者古人之德宥罪者君子之仁朕臨御以來殊恩屢下矧方隆於郡寄宜一洗於刑書爾頃坐愆違法當褫秩旣荐更於肆眚盍悉復於故官尚謹厥修勿以為幸可

蘭整復官制

勅朕祇見圓丘肆頒大賚赦過宥罪咸與惟新施惠行仁無遠弗屆矧方共於武服宜一洗於丹書具官久歷邊陲屢膺任使頃上太原之奏有虧石建之恭降領廉

卷三
車已更需澤其復使名之舊以昭慶典之行往服恩榮
益思祇慎可

李釜轉官致仕制

勅告老而閔煩若古之明訓以疾而謝事近代之通規
眷予邇臣宜加恩典具官名生於實行顧於言早冠儒
科浸階撫仕馮唐潛於郎署仲舒老於膠西比疇夙望
之孚擢掌贊書之重乃陳疾疚願丐麾符方躋次對之
班遽上退休之請勉從爾志敘進文階式寵其歸往欽

朕命可

曹昱轉官致仕制

勅告老而閔煩若古之明訓以疾而謝事近代之通規
眷予邇臣宜加恩典具官持身愿慤迪德端良出於鼎
甲之門自勵材猷之美荐更任使進陟近班遽上封章
願還印綬其勉從於雅志仍增秩於崇階以彰止足之
風以示歸休之寵欽予時命益介壽康可

韓儼加職制

金史四庫全書
卷三
勅雲夢之間復為支郡自頃寇攘屢擾二千石能保其
封疆亦已難矣爾以材猷往膺郡寄撫循疲瘵逮此暮
年俾進爾職以彰治理之效傳不云乎有功而見知則
說矣尚勉之哉可

辛興宗辛企宗降官制

勅無將之誅罔或攸赦緣坐之法厥有常刑豈容私恩
輒紊成憲具官早共武服久捍邊陲旣稍積於戰多遂
進躋於留務屬時逆黨乃爾外姻弗知請罪於私門遽

敢露章於政府公為道地輕視朝廷其降領於廉車尚
屈從於寬典往思循省無重悔尤可

